

## ԳԻՏԱԿԱՆ ՆՍՏԱՇՐՋԱՆ ՆՎԻՐՎԱԾ ԱԿԱԴԵՄԻԿՈՍ Հ. ՄԱՆԱՆԴՅԱՆԻ ՀԻՇԱՏԱԿԻՆ

Հայկական ՍՍՌ ԳԱ պատմության ինստիտուտի հերթական գիտական նստաշրջանը նվիրված էր ՍՍՌՄ և ՀՍՍՌ գիտությունների ակադեմիաների իսկական անդամ, բազմափաստակ գիտնական, ակադեմիկոս Հայրենի Մանանդյանի ծննդյան 90-ամյակին:

Պատմության ինստիտուտի ղերեկտոր, պատմական գիտությունների դոկտոր Գ. Գալոյանի քաջման խոսքից հետո ակադեմիկոս Հայրենի Մանանդյանի կյանքի ու ստեղծագործության մասին զեկուցումով հանդես եկավ պատմական գիտությունների թեկնածու Գ. Սարգսյանը:

—1897 թ.,—ասաց զեկուցողը,—ալարտելով Ենայի համալսարանի պատմա-բանասիրական ֆակուլտետը (ստանալով փիլիսոփայության դոկտորի գիտական աստիճան), իսկ հետագայում Պետերբուրգի կայսերական համալսարանի արևելյան լեզուների, Տարտուի համալսարանի իրավաբանական ֆակուլտետները, զինվելով բազմակողմանի գիտելիքներով, Հ. Մանանդյանը արգասավոր աշխատանք է կատարում հայ բանասիրության բնագավառում:

Հայաստանի խորհրդայնացումից հետո Մանանդյանն ակտիվորեն մասնակցում է Երևանի պետական համալսարանի ստեղծմանը և դառնում նրա առաջին ռեկտորը, միաժամանակ ավանդելով հայ ժողովրդի պատմության դասընթացը: Այդ տարիներին Մանանդյանն ուսումնասիրում է Հայաստանի սոցիալ-տնտեսական պատմությունը: 40-ական թվականներին անխոնջ գիտնականի միտքը կենտրոնանում է Հայաստանի քաղաքական պատմության պրոբլեմների վրա: Նա հրատարակում է Տիգրան Երկրորդի ժամանակաշրջանին նվիրված իր հիմնալի մեծագրությունը: Դրանից հետո՝ ձեռնամուխ է լինում «Քննական տեսություն հայ ժողովրդի պատմության» բազմահատոր աշխատության ստեղծմանը: Մանանդյանը կարևոր ուսումնասիրություններ է կատարել նաև պատմական աշխարհագրության, Հայաստանի առևտրական ու ռազմական ճանապարհների, պատմական չափադրության ու դրամագիտության ասպարեզներում: Դրանք հիմք են դարձել հայ ժողովրդի պատմական կյանքի այս կամ այն պրոբլեմներին նվիրված աշխատությունների համար:

—Պատմա-բանասիրական իր հոյակապ պատրաստությամբ,—ասում է զեկուցողը,—փայլուն էրուդիցիայով, Մանանդյանը հայոց պատմությունից զատ, ընդգրկում էր նաև սահմանամերձ երկրների, անտիկ աշխարհի, Արևմտյան նվրոպայի, Ռուսաստանի պատմության խրեյիները: Բազմաթիվ հին ու նոր լեզուների իր իմացությամբ, հետազոտողի իր բացառիկ ձիրքով նա դասվում է սովետական պատմաբանների լավագույն ներկայացուցիչների շարքին:

Ուշագրավ է նորահայտ փաստերով հարուստ էր ակադեմիկոս Ս. Երեմյանի զեկուցումը՝ «Նաքի-Ռուստեմի եռալեզու արձանագրության վկայությունները Հայաստանի մասին» թեմայով:

Այդ արձանագրությունը հայտնաբերվել է 1930-ական թվականներին Պետսկոպոլից հյուսիս, Նաքի-Ռուստեմի ժայռի մոտ գտնվող մի շինության պատերի վրա, որը գիտությանը հայտնի է Res gestae divi saporis անունով: Այն զրված է պարսկերեն, պահլավերեն ու հունարեն և հաղորդում է Պարսից արքա Շապուհ Ա-ի (241—272) թագավորության ժամանակ տեղի ունեցած նշանավոր անցքերի մասին:

—Երրորդ դարը,—ասում է ակադեմիկոս Ս. Երեմյանը,—Հայաստանի պատմության ամենամոթ շրջաններից մեկն է: Մենք այդ ժամանակաշրջանի մասին չունենք այնօրյա աղբյուրներ, իսկ հետագա աղբյուրների տեղեկությունները շատ համառոտ են, խառնաշփոթ և մասամբ լի՝ միտումնավոր: Այդ բացը մեծապես լրացնում է Շապուհի արձանագրությունը, որի պարունակած տեղեկությունները ապացուցում են պատմաֆուլ Մ. Խորենացու «Հայոց պատմության» երկրորդ գրքի 71—79-րդ գլուխներում բովանդակած հիմնական փաստերի պատմականությունը: Խորենացու պատմության հիշյալ գլուխները նվիրված են երրորդ դարի պատմական զեպքերի նկարագրությանը, երբ Մեծ Հայքի դահի վրա իրեն ժառանգական զահակալներ նոր էին հաստատվել հայ Արշակունիները:

Զեկուցողը նշում է, որ, ելնելով սույն արձանագրության տվյալներից, անհրաժեշտ է վերանայել Հ. Մանանդյանի այն եզրակացությունը, թե Հայաստանը սասանյան Պարսկաստանի

կողմից նվաճված չի եղել ոչ Փիլիպոս Արաբացու և ոչ էլ նրա հաջորդի՝ Դեկոսի ժամանակ, Շապուհի արձանագրության տեղեկությունները ցույց են տալիս, որ հռոմեական կայսրության և սասանյան իրանի միջև ստեղծված պայմաններում անկարելի էր, որ Հայաստանն անկախ մնար, նա երկար չէր կարող դիմադրել և 251—252 թթ. ենթարկվել է սասանյան իրանին։ Խոսելով Շապուհ առաջինի կողմից Հայաստանի թագավոր նշանակված ոմն Արտավազդի վերաբերյալ արձանագրության տվյալների մասին, ակադեմիկոս Ս. Երեմյանը գտնում է, որ ճիշտ պետք է համարել Ղ. Ալիշանի այն ենթադրությունը, որ սա Մ. Խորենացու հիշատակած Արտավազդ Մանդակունին պետք է լինի։

17-րդ դարի հայ վաճառականի նորահայտ հաշվեմատյանի մասին հետաքրքիր հաղորդումով հանդես եկավ Հայաստանի գիտությունների ակադեմիայի թղթակից-անդամ, պատմական գիտությունների դոկտոր Լ. Խաչիկյանը։

—Հնագույն ժամանակներից,—ասաց նա,—հայ խոջայական միջավայրում ձևավորված վաճառականական կարգերն ու հարաբերությունները, որ սերնդե-սերունդ հարատևելով գրի են առնվել և օրենքի ուժ ստացել 1765 թ. Աստրախանում, հնարավորություն են տալիս մոտիկից ծանոթանալու դրամատու խոջայի և դրամառու գործակատարի փոխադարձ պարտավորություններին։ Այդ պարտավորությունները ձևակերպվել են, ի նկատի ունենալով դրամատուր մեծածառականների տնտեսական ու դասային շահերը։ Ուրիշների դրամով գործող և օրենքը կողմող վաճառականները հանդիսացել են խոջաների կամքը կատարող գործակատարները միայն։ Այդպիսի գործակատարներից մեկն է եղել նաև Տեր Դավթի որդի Հովհաննես Զուղայեցին, որը 1682 թ. մի համաձայնագիր է ստորագրել երկու վաճառական եղբայրների հետ և նրանց դրամագլխով մտնելով առևտրի ասպարեղ, մեկնել է Հնդկաստան։

Համաձայնագիրը ստորագրելու օրվանից ի վեր, շուրջ 11 տարի, Հովհաննեսը մանրամասն շարադրել է իր առևտրական գործունեությունը և տվել առանձին ապրանքների առուծախի վերաբերող տվյալներ։ Այդ արժեքավոր հաշվեմատյանը հասել է մինչև մեր օրերը և գտնվում է Պորտուգալիայում՝ Լիսաբոնի ազգային գրադարանում։ Հաշվեմատյանի գրառումները կատարված են հստակ և զրազեռ, հաշվապահական կայուն սկզբունքներով, առանձին սյունակներում հոդված առ հոդված տրված են ելքի և մուտքի հաշիվները։

Անդրադառնալով Հովհաննեսի երթուղուն և անհրաժեշտ տեղեկություններ հաղորդելով նրա կատարած առուծախի հիմնական գործարքների մասին, Լ. Խաչիկյանը առանձնապես անդրադարձավ Հովհաննես Զուղայեցու՝ Նեպալ և Տիբեթ կատարած ճամփորդությանը, նշելով, որ նա արևելագիտության մեջ ներկայումս հայտնի երրորդ օտարազգի անձնավորությունն է, որ մուտք է գործել Տիբեթ և զրավոր փաստաթուղթ թողել այդ մասին։ Նախորդ երկուսի տված տեղեկությունները շատ համառոտ են, մասամբ կասկածելի ու չինժու, մինչդեռ Հովհաննեսի գրառումները ստույգ են և արժանահավատ։ Նա Տիբեթի մայրաքաղաք Լհասայում բնակվել է շուրջ 5 տարի, գործ է ունեցել տասնյակ պետական պաշտոնյաների, բուդայական հոգևորականության ներկայացուցիչների, վաճառականների և այլ անձանց հետ, սովորել է տեղական լեզուն, ժողովրդի կենցաղն ու բարքերը և այդ ամենի մասին գրանցել իր հաշվեմատյանում։ Այս առումով նա չունի իր նախորդը, ինչպես և՛ ժամանակակից հաջորդը։

Վերջում ընդգծելով հաշվեմատյանի նշանակությունը, ղեկուցողը նշեց, որ այդ մատյանը նոր լույս է սփռում Հնդկաստանի, Նեպալի ու Տիբեթի տնտեսական կյանքի պատմության շուրջումնասիրված ու մոթ շատ բնագավառների վրա։

Զեկուցումներից հետո Հ. Մանանդյանի մասին հետաքրքրական հուշերով հանգես եկան ակադեմիկոս Աշ. Հովհաննիսյանը<sup>1</sup>, Հ. Մանանդյանի աշակերտներ, Հայաստանի գիտությունների ակադեմիայի թղթակից-անդամ Մ. Հասրաթյանը և Լ. Խաչիկյանը, պատմական գիտությունների դոկտոր Կ. Ղաֆադարյանը։

Վ. ՍԱՆԹՐՈՍՅԱՆ

<sup>1</sup> Ակադեմիկոս Ա. Գ. Հովհաննիսյանի խոսքը տպագրվում է «Տեղեկագրի» այս համարում։